

四庫全書

經部

欽定四庫全書

經部

五禮通考卷一百二十一

詳校官侍郎<sub>臣</sub>劉躍雲

給事中<sub>臣</sub>溫常綬覆勘

總校官進士<sub>臣</sub>繆璘

校對官中書<sub>臣</sub>嵇承志

謄錄監生<sub>臣</sub>華光楣

欽定四庫全書

五禮通考卷一百二十一

刑部尚書秦蕙田撰

吉禮一百二十一

祀孔子

春秋哀公十六年左氏傳夏四月己丑孔丘卒

注仲尼既告老

去位猶書卒者魯之君忌崇其聖德殊而異之四月公

十八日乙丑無己丑己丑五月十二日日月必有誤  
誅之曰昊天不弔不懲遺一老俾屏余一人在位兢兢

余在疚嗚呼哀哉尼父無自律

注愍且也屏蔽也律法也言喪尼父無以自為

法疏鄭衆曰誄謂積累生時德行以賜之命主為其辭鄭元禮記註云誄累也誄列生時行迹讀之以作誄

此傳惟說誄辭不言作誄傳記羣書皆不言孔子之誄蓋惟誄其美行示已傷悼之情而賜之命耳不為之誄

故書傳無稱焉至漢王莽輔政尊尚儒術封孔子後為褒成侯追謚孔子為褒成宣尼君明是舊無謚也鄭元

禮註云尼父因自字以為之謚謂謚孔父為尼父鄭元錯讀左傳云以字為謚遂復妄為此解

禮記檀弓魯哀公誄孔丘曰天不遺耆老莫相予位焉

嗚呼哀哉尼父

注誄其行以為謚也言孔子死無佐助我處位者尼父因其字以為之謚

吳氏澄曰誄者述其功行以哀之詞如後世祭文之類非謚也

欽定義疏有誅而不謚者如哀公之誅尼父是也有誅而謚者如衛之謚貞惠文子是也謚必兼誅而誅不必兼謚鄭謂誅其行以為謚似未必然

史記孔子世家孔子葬魯城北泗上

皇覽曰孔子冢去城一里冢塋百畝

冢南北廣十步東西十三步高一丈二尺冢前以甌甃為祠壇方六尺與地平本無祠堂冢塋中樹以百數皆異種魯人世世無能名其樹者民傳言孔子弟子異國  
人各持其方樹來種之其樹作粉維女貞五味鳧檀之類孔子塋中不生  
荆棘及刺人草  
弟子及魯人往從冢而冢者百有餘

室因命曰孔里魯世世相傳以歲時奉祀孔子冢而諸

儒亦講禮鄉飲大射于孔子冢孔子冢大一頃故所居

堂弟子內後世因廟藏孔子衣冠琴車書

索隱曰謂孔子所居之室

其弟子之中孔子沒後後代因廟藏夫子平生衣冠琴書於壽堂中

至於漢二百餘年不

絕高皇帝過魯以太牢祀焉諸侯卿相至常先謁然後

從政

太史公曰詩有之高山仰止景行行止雖不能至然心

鄉往之余讀孔氏書想見其為人適魯觀仲尼廟堂車

服禮器諸生以時習禮其家余低回留之不能去云天

下君王至於賢人衆矣當時則榮沒則已焉孔子布衣  
傳十餘世學者宗之自天子王侯中國言六藝者折中  
於夫子可謂至聖矣

右周

漢書高祖本紀十二年十一月行自淮南還過魯以太  
牢祀孔子

邱氏濬曰此漢以來祀孔子之始

晉書禮志昔武王入殷未及下車而封先代之後蓋追

思其德也孔子以大聖而終於陪臣未有封爵至漢元帝孔霸以帝師賜爵號褒成君奉孔子後

漢書儒林傳元帝即位徵霸以帝師賜爵關內侯食邑八百戶號褒成君

史記孔子世家正義括地志云漢封夫子十二代孫忠為褒成侯生光為丞相封侯平帝封孔霸孫莽二千戶為褒成侯後漢封十七代孫志為褒成侯魏封二十二代孫羨為崇聖侯晉封二十三代孫震為奉



聖亭侯後魏封二十七代孫為崇聖大夫孝文帝又封三十一代孫珍為崇聖侯高齊改封珍為恭聖侯周武帝改封鄒國公隋文帝仍舊封鄒國公煬帝改為紹聖侯皇唐給復二千戶封孔子裔孫孔德倫為褒聖侯也

成帝本紀綏和元年二月癸丑詔曰蓋聞王者必存二王之後所以通三統也昔成湯受命列為三代而祭祀廢絕考求其後莫正孔吉其封吉為殷紹嘉侯三月進

爵為公及周承休侯皆為公地各百里

文獻通考梅福上書曰武王克殷未及下車存五帝  
之後封殷於宋紹夏於杞明著三統示不獨有也是  
以姬姓半天下遷廟之主流出於戶所謂存人以自  
立者也今成湯不祀殷人無後陛下繼嗣久微殆為  
此也春秋經曰宋殺其大夫穀梁傳曰其不稱名姓  
以其在祖位尊之也此言孔子故殷後也雖不正統  
封其子孫以為殷後禮亦宜之何者諸侯奪宗聖庶

奪適傳曰賢者子孫宜有土而況聖人又殷之後哉  
昔成王以諸侯禮葬周公而皇天動威雷風著災今  
仲尼之廟不出闕里孔氏子孫不免編戶以聖人而  
歆匹夫之祀非皇天之意也今陛下誠能據仲尼之  
素功以封其子孫則國家必獲其福又陛下之名與  
天亡極何者追聖人素功封其子孫未有法也後聖  
必以為則不減之名可不勉哉福祿遠又譏切王氏  
故終不見納初武帝時封周後姬嘉為周子南君至

元帝時尊周子南君為周承休侯位次諸侯王使諸大夫博士求殷後分散為十餘姓郡國徃徃得其大家推求子孫絕不能紀時匡衡議以為王者存二王後所以尊其先王而通三統也其犯誅絕之罪者絕而更封他親為始封君上承其王者之始祖春秋之義諸侯不能守其社稷者絕今宋國已不守其統而失國矣則宜更立殷後為始封君而上承湯統非當繼宋之絕侯也宜明得殷後而已今之故宋推求其

嫡久遠不可得雖得其嫡嫡之先已絕不當得立禮  
記孔子曰丘殷人也先師所共傳宜以孔子世為湯  
後上以其語不經遂見寢至成帝時梅福復言宜封  
孔子後以奉湯祀綏和元年立二王後推迹古文以  
左氏穀梁世本禮記相明遂下詔封孔子世為殷紹  
嘉公

蕙田案紹嘉侯之封雖曰繼殷之後其實亦  
是奉孔子也觀梅福之言曰今陛下誠能據

仲尼之素功以封其子孫則國家必獲其福  
匡衡之言曰禮記孔子曰某殷人也先師所  
共傳宜以孔子世為湯後意可知矣故文獻  
通考載之於褒贈先聖先師門內而愚於是  
編亦附其內云

平帝本紀元始元年封孔子後孔均為褒成侯奉其祀  
追謚孔子曰褒成宣尼公

邱氏濬曰案此後世尊崇孔子之始夫平帝之世政  
出王莽姦偽之徒假崇儒之名以收譽望文姦謀聖

人在天之靈其不之受也必矣有若曰自生民以來  
未有盛於夫子者也豈一言一行之美而可以節惠  
立謚者哉然則不加以謚號將何以稱曰千萬世之  
下惟曰先師孔子以見聖人所以為萬世尊崇者在  
道不在爵  
位名稱也

後漢書鍾離意傳注意別傳曰意為魯相到官出私  
錢萬叁千文付戶曹孔訢修夫子車身入廟拭几席  
劍履男子張伯除堂下草土中得玉璧七枚伯懷其  
一以六枚白意意令主簿安置几前孔子教授堂下  
床首有懸甕意召孔訢問此何甕也對曰夫子甕也

背有丹書人莫敢發也意曰夫子聖人所以遺甕欲以懸示後賢因發之得素書文曰後世修吾書董仲舒護吾車拭吾履發吾笥會稽鍾離意壁有七張伯藏其一意即召伯問果服焉

右漢

後漢書世祖本紀建武五年二月壬申封殷後孔安為

殷紹嘉公

注成帝封孔吉為紹嘉公安即吉之裔也

冬十月還幸魯使大司空祠孔子



蕙田案此遣官祀闕里之始

十三年二月庚午以殷紹嘉公孔安為宋公

十四年夏四月辛巳封孔子後志為褒成侯

注平帝封  
孔均為褒

成侯志  
均子也

馬氏端臨曰西漢時孔氏之裔侯者二人紹嘉侯奉

殷後也褒成侯奉孔子之後也建武中興襲爵如故

紹嘉之後不知所終褒成之後則志卒子損嗣至和

帝永元四年徙封褒尊侯損卒子曜嗣曜卒子元嗣

相傳至獻帝初國絕魏時再襲封世世不絕

明帝本紀永平十五年三月幸孔子宅祠仲尼及七十二弟子親御講堂命皇太子諸王說經

注漢春秋曰帝時升廟立羣臣中庭北面皆再拜帝進爵而後坐

冊府元龜永平十五年帝東巡過魯幸孔子宅祠仲尼及七十二弟子親御講堂命皇太子諸王說經帝自製五經要說章句令桓郁較定於宣明殿其後帝

親於辟雍自講所著五經章已復令郁說一篇帝謂  
郁曰我為孔子卿為子夏起子者商也又問郁曰子  
幾人能傳學郁曰臣子皆未能傳學孤兄子一人學  
方起帝曰努力教之有起者即白之

邱氏濬曰此後世祀孔子弟子之始

章帝本紀元和二年二月丙辰東巡狩三月己丑進幸  
魯庚寅祀孔子於闕里及七十二弟子賜褒成侯及諸  
孔男女帛

東漢書曰祠禮畢命儒者論難

孔僖傳元和二年二月帝東巡狩還過魯幸闕里以太  
牢祀孔子及七十二人作六代之樂大會孔氏男子二  
十以上者六十三人命儒者講論語僖自陳謝帝曰今  
日之會於卿宗有光榮乎對曰臣聞明王聖主莫不尊  
師貴道今陛下親屈萬乘辱臨敝里此乃崇禮先師增  
輝聖德至於光榮非所敢承帝笑曰非聖者子孫焉有  
斯言乎遂拜僖郎中賜褒成侯損及孔氏男女錢帛

安帝本紀延光三年春二月東巡狩三月戊戌祀孔子  
及七十二弟子於闕里自魯相令丞尉及孔氏親屬婦  
女諸生悉會賜褒成侯以下帛各有差

闕里志元嘉二年詔孔子廟置百石卒史一人掌領禮  
器春秋享禮出王家錢給大酒值河南尹給牛羊豕各  
一大司農給米

後漢置百石卒史詔碑司徒臣雄司空臣戒稽首  
言魯前相瑛書言詔書崇聖道勉六藝孔子作春秋

制孝經刪述五經演易繫辭經緯天地幽贊神明故  
特立廟褒成侯四時來祠事已即去廟有禮器無常  
人掌領請置百石卒史一人典主守廟春秋饗禮財  
出王家錢給大酒直須報謹問太常祠曹掾馮牟史  
郭玄辭對故事辟雍禮未行祠先聖師侍祠者孔子  
子孫太宰太祝令各一人皆備爵太常丞監祠河南  
尹給牛羊豕雞各一大司農給米祠臣愚以為宜如瑛  
言夫子大聖則象乾坤為漢制作先世所尊祠用衆

牲長吏備爵今欲加寵子孫敬恭明祀傳於罔極可  
許臣請魯相為孔子廟置百石卒史一人掌領禮器  
出王家錢給大酒直他如故事臣雄臣戒愚戇誠惶  
誠恐頓首稽首死罪死罪臣稽首以聞制曰可元嘉  
三年三月二十七日壬寅司徒雄司空戒下魯相承  
書從事下當用者選年四十以上經通一藝雜試通  
利能弘先聖之禮為宗所歸者如詔書到言永興元  
年六月甲辰朔十六日辛酉魯相平行長史事下守

長擅叩頭死罪敢言之司徒司空府壬寅詔書為孔  
子廟置百石卒史一人掌領禮器選年四十以上經  
通一藝雜試通利能奉弘先聖之禮為宗所歸者平  
叩頭叩頭死罪死罪謹案文書守文學掾魯孔龢師  
孔憲戶曹史孔覽等雜試龢修春秋嚴氏通經高第  
事親至孝能奉先聖之禮為宗所歸一除龢補名狀  
如牒平惶恐叩頭死罪上司空府讚曰巍巍大聖赫  
赫彌章相乙瑛字少卿平原高唐人令鮑疊字文公



上黨屯留人政教稽古名重規矩乙君察舉守宅除吏孔子十九世孫麟廉請置百石卒史一人鮑君造作百石史舍功垂無窮于是始闕

靈帝建寧二年詔祀孔子依社稷出王家穀春秋行禮魯相史晨奏出王家穀祀夫子碑建寧二年三月癸卯朔七日己酉魯相臣晨長史臣謙頓首死罪上言臣蒙厚恩受任符守得在奎婁周孔舊寓不能闡弘德政恢崇一變夙夜憂怖累息屏營臣晨頓首頓

首死罪死罪臣以建寧元年到官行秋享飲酒泮宮  
畢復禮孔子宅拜謁神座仰瞻椽桷俯視几筵靈所  
憑依肅肅猶存而無公出酒脯之祠臣即自以俸錢  
修上案食醎具以叙小節不敢空謁臣伏念孔子乾  
坤所挺西狩獲麟為漢制作故孝經援神契曰立  
制命帝卯行又尚書考靈曜曰立生倉際觸期稽度  
為立制故作春秋以明文命綴紀撰書修定禮儀  
臣以為素王稽古德亞皇代雖有褒成世享之封四

時來祭畢即歸國臣伏見臨辟雍日祠夫子以太牢  
長吏備爵所以尊先師重教化夫封土為社立稷而  
祀皆為百姓興利除害以祈豐穰月令祀百辟卿士  
有益於民矧乃孔子玄德煥炳光於上下而本國舊  
居復禮之日闕而不祀誠朝廷聖恩所宜特加臣寢  
息耿耿情所思維臣輒依社稷出王家穀春秋行禮  
以供禋祀餘昨賜先生執事臣晨誠惶誠恐頓首頓  
首死罪死罪上言太尉司徒司空大司農府治所部

從事府昔在仲尼汁光之精大帝所挺顏母毓靈承  
弊遭衰黑不代倉轍環歷聘歎鳳不臻自衛反魯養  
徒三千獲麟輟作端門見徵血書著紀黃玉韻應  
主為漢制道審可行乃作春秋復演孝經刪定六藝  
象與天談釣河適洛郤揆未然巍巍蕩蕩與乾比崇

右東漢

三國魏志文帝本紀黃初二年春正月詔曰昔仲尼資  
大聖之才懷帝王之器當衰周之末無受命之運在魯

衛之朝教化乎洙泗之上棲棲焉遑遑焉欲屈己以存  
道貶身以救世於時王公終莫能用之乃退考五代之  
禮修素王之事因魯史而制春秋就太師而正雅頌俾  
千載之後莫不宗其文以述作仰其聖以成謀茲可謂  
命世之大聖億載之師長者也以遭天下大亂百祀隳  
廢舊居之廟隳而不修褒成之後絕而莫繼闕里不聞  
講頌之聲四時不覩烝嘗之位斯豈所謂崇化報功盛  
德百代必祀者哉其以議郎孔羨為宗聖侯邑百戶奉

孔子祀命魯郡修起舊廟置百石吏卒以守衛之又於  
其外廣為室屋以居學者

晉書禮志魏文帝黃初二年正月詔以議郎孔羨為宗  
聖侯邑百戶奉孔子祀令魯郡修舊廟置百戶吏卒以  
守衛之

魏志崔林傳林為司空魯相上言漢舊立孔子廟褒  
成侯歲時奉祀辟雍行禮必祭先師王家出穀春秋  
祭祀今宗聖侯奉嗣未有命祭之禮宜給牲牢長吏

奉祀尊為貴神制三府議博士傳祇以春秋傳言立  
在祀典則孔子是也宗聖適足繼絕世章盛德耳至  
於顯立言崇明德則宜如魯相所上林議以為宗聖  
侯亦以王命祀不為未有命也周武王封黃帝堯舜  
之後及立三恪禹湯之世不列於時復特命他官祭  
也今周公以上達於三皇忽焉不祀而禮經亦存其  
言今獨祀孔子者以世近故也以大夫之後特受無  
疆之祀禮過古帝義踰湯武可謂崇明報德矣無復

重祀於非族也

右三國魏

晉書武帝本紀泰始三年十二月徙宗聖侯孔震為奉  
聖亭侯

禮志武帝泰始三年十一月改宗聖侯孔震為奉聖亭  
侯又詔太學及魯國四時備三牲以祀孔子

宋書禮志晉明帝大寧三年詔給事奉聖亭侯孔亭四  
時祀孔子祭如泰始故事



晉書孝武帝紀太元十一年秋八月庚午封孔靖之為奉聖亭侯奉宣尼祝

宋書文帝本紀元嘉十九年十二月丙申詔曰胄子始集學業方興自微言泯絕逝將千祀感事思人意有慨然奉聖之後可速議繼襲於先廟地特為營造依舊給祠直令四時享祀闕里往經寇亂黷校殘毀并下魯郡修學舍採召生徒昔之賢哲及一介之善猶或衛其邱壠禁其芻牧况尼父德表生民功被百代而墳塋荒蕪

荊棘弗剪可蠲墓側數戶以掌灑掃魯郡上民孔景等  
五戶居近孔子墓側蠲其課役供給灑掃并種松栢六  
百株

孝武帝本紀孝建元年十月戊寅詔曰仲尼體天降德  
維周興漢經緯三極冠冕百王爰自前代咸加褒述典  
司失人用闕宗祀先朝遠存遺範有詔繕立世故妨道  
事未克就國難頻深忠勇奮勵實憑聖義大教所敦永  
惟兼懷無忘待旦可開建廟制同諸侯之禮擇爽塏厚

給祭秩

禮志文帝元嘉八年奉聖侯有罪奪爵至十九年又授  
孔隱之隱之兄子熙先謀逆又失爵二十八年更以孔  
惠雲為奉聖侯後有重疾失爵孝武大明二年又以孔  
邁為奉聖侯邁卒子莽嗣有罪失爵

齊書武帝本紀永明七年二月詔曰宣尼誕敷文德峻  
極自天發輝七代陶鈞萬品英風獨舉素王誰匹功隱  
於當年道深於日月感麟厭世緬邈千祀川竭谷虛邱

夷淵塞非但洙泗湮淪至乃饗嘗之主前王敬仰崇修  
寢廟歲月亟流鞠為茂草今學數興立實稟洪規撫事  
懷人彌增欽屬可改築宗祊務在爽塏量給祭秩禮同  
諸侯奉聖之爵以時紹繼

明帝本紀永泰元年三月詔曰仲尼明聖在躬允光上  
哲弘厥雅道大訓生民師範百王軌儀千載立人斯仰  
忠孝攸出元功潛被至德彌闡雖反袂遐曠而祧薦靡  
闕時祭舊品秩比諸侯頃歲以來祀典凌替俎豆寂寥

牲奠莫舉豈所以克昭盛烈永隆風教者哉可式循舊  
典詳復祭秩使牢餼備禮欽饗兼申

梁書武帝本紀天監四年六月庚戌立孔子廟

敬帝本紀太平二年春正月壬寅詔曰夫子降靈體詰  
經仁緯義允光素王載闡元功仰之者彌高誨之者不  
倦立忠立孝德被蒸民制禮作樂道冠羣后雖泰山頽  
峻一簣不遺而泗水餘瀾千載猶在自皇圖屯阻祧薦  
不修奉聖之門嗣續殲滅敬神之寢簋簋寂寥永言聲

烈實兼欽愴可搜舉魯國之族以為奉聖後并繕廟堂  
供備祀典四時薦秩一皆遵舊

陳書廢帝本紀光大元年十二月庚寅以兼從祀中郎  
孔英哲為奉聖亭侯奉孔子祀

北魏書世祖本紀太平真君十一年八月興駕南伐十  
有一月至於鄒山使使者以太牢祀孔子

禮志世祖南征至魯以太牢祭孔子

顯祖皇興二年以青徐既平遣中書令兼太常高允以

太牢祀孔子

冊府元龜皇興二年以青徐平詔中書令高允兼太常至兗州以太牢祭孔子廟帝謂允曰此簡德而行勿有辭也

北魏書高祖本紀延興二年二月乙巳詔曰尼父稟達聖之姿體生知之量窮理盡性道光四海頃者淮徐未賓廟隔非所致令祀典寢頓禮章殄滅遂使女巫妖覡淫進非禮殺牲鼓舞倡優媒狎豈所以尊明神敬聖道

者也自今以後有祭孔子廟制用酒脯而已不聽婦女合雜以祈非望之福犯者以違制論其公家有事自如常禮犧牲粢盛務盡豐潔臨時致敬令肅如也牧司之官明糾不法使禁令必行

太和十三年七月立孔子廟於京師

蕙田案此京師立孔廟之始

十六年二月丁未改謚宣尼曰文聖尼父告謚孔廟癸丑帝臨宣文堂引儀曹尚書劉祖鴻臚卿游明根行儀



曹事李韶授策孔子崇文聖之謚於是昶等就廟行事  
既而帝齋中書省親拜祭於廟

邱氏濬曰案有司薦享始于此前此但云釋奠而未  
嘗言廟至是始有宣尼廟之文

蕙田案此即十三年所立京師之廟邱氏不  
深考遂以為至是始有宣尼廟之文耳

十九年四月庚申行幸魯城親祠孔子廟辛酉詔拜孔  
氏四人顏氏二人為官如徐州又詔選諸孔宗子一人

封崇聖侯邑一百戶以奉孔子之祠又詔兗州為孔子起園栢修飾墳壠更建碑銘褒揚聖德

文獻通考後魏封孔子二十七葉孫乘為崇聖大夫孝文太和十九年改封二十八葉孫珍為崇聖侯

北齊書文宣帝本紀天保元年六月詔封崇聖侯邑一百戶以奉孔子之祀并下魯郡以時修治廟宇務盡宸崇之至遣使人致祭孔父

文獻通考北齊改封三十一代孫為恭聖侯

後周武帝平齊改封孔子後為鄒國公

北周書宣帝本紀大象二年三月丁亥詔曰盛德之後  
是稱不絕功施於民義昭祀典孔子德惟藏往道實生  
知以大聖之才屬千古之運載弘儒業式叙彛倫至如  
幽贊天人之理裁成禮樂之務故以作範百王垂風萬  
葉朕欽承寶歷服膺教義眷言洙泗懷道茲深且衆成  
啟號雖彰故實旌宗聖績猶有闕如可追封為鄒國公  
邑數准舊并立後承襲別於京師置廟以時祭享

右南北朝

文獻通考隋文帝仍舊封孔子後為鄒國公煬帝改封  
為紹聖侯

右隋

唐書禮樂志高祖武德九年封孔子之後為褒聖侯  
關里志武德九年十二月二十九日詔曰宣尼以大聖  
之德天縱多能王道藉以裁成人倫資其教義故孟軻  
稱生民以來一人而已自漢氏馭歷魏室分區爰及晉

朝暨於隋氏咸相尊尚用存享祀朕欽若前王憲章故  
實親師宗聖是所庶幾存亡繼絕仰推通典可立孔子  
後為褒聖侯以隋故紹聖侯孔嗣衍嫡子德倫為嗣  
唐書太宗本紀貞觀十一年七月丙午給兗州孔子廟  
戶二十以奉享

禮樂志貞觀十一年尊孔子為宣父作廟於兗州給戶  
二十以奉之

文獻通考貞觀十一年封孔子裔德倫為褒聖侯

舊唐書高宗本紀乾封元年正月甲午次曲阜縣幸孔子廟追贈太師增修祠宇以少牢致祭

闕里志乾封元年正月車駕發泰山至曲阜親幸祠廟詔曰朕聞德契機神盛烈光於後代化成天下元功被於庶物魯大司寇宣尼父孔某資大聖之材屬衰周之末思欲屈已濟俗弘道佐時歷聘周流莫能見用想乘桴而永歎因獲麟而興感於是垂素王之雅則正魯史之繁文播鴻業於一時昭景化於千祀朕嗣膺寶歷祇

奉璿圖憲章前王規矩先聖崇至公於海內行大道於  
天下遂得八表乂安兩儀交泰功成化洽禮備樂和展  
采東巡回輿西土途經茲境撫事興懷駐蹕荒區願為  
師友瞻望幽墓思承格言雖殿寢荒蕪舊基尚在靈廟  
空寂徽烈猶存孟軻曰自生民以來未若孔子者也微  
禹之歎既深褒崇之道宜峻可追贈太師庶年代雖遠  
式範今圖景業維新儀刑茂實其廟宇傾頽者宜更加  
修造仍令三品一人以少牢致祭褒聖侯德倫既承允

嗣有異常流其子孫並宜免賦役

冊府元龜咸亨元年五月詔曰諸州縣孔子廟堂有破壞并先來未造者遂使先師闕奠祭之儀久致飄零深非敬本宜令有司速事營造

唐書禮樂志武后天授元年封周公為褒德王孔子為隆道公神龍元年以鄒魯百戶為隆道公采邑以奉歲祀子孫世襲褒聖侯

舊唐書禮儀志神龍元年以鄒魯百戶封隆道公謚曰



文宣

太極元年正月詔孔宣父祠廟令本州修飾取側近三十户以供灑掃

元宗本紀開元十三年十一月丙申幸孔子宅遣使以太牢祭其墓給復近墓五户

冊府元龜十三年親設奠祭詔曰孔宣父誕聖自天垂範百代作王者之師表開生民之耳目朕增封岱嶽廻鑾泗濱思闕里之風想雩壇之詠逝矣遺烈慨然永懷

式遵祀典用申誠敬宜令禮部尚書蘇頌以太牢致祭  
仍令州縣以時祀享復近墓五戶長供掃除

玉海古者惟功臣與祭大烝未聞弟子從祀於師也  
自建武祠七十二子於孔廟然亦不出闕里也貞觀  
末加以左卜諸儒從祀太學而武成王之祠亦倣而  
為之總章開元以來又加諸儒以三等之爵而州縣  
學宮咸有從祀矣

文獻通考德宗建中三年以文宣王三十七代孫齊卿

為兗州司馬襲文宣王

憲宗元和四年以文宣王三十八代孫惟昉為兗州參軍

十三年以文宣王三十八代孫惟睦襲文宣王

武宗會昌二年以文宣王三十九代孫榮為國子監丞襲文宣王

右唐

五代史周本紀太祖廣順二年六月乙酉朔幸曲阜祀

孔子

冊府元龜廣順二年五月親往兗州辛未遣端明殿學士顏行往曲阜祀文宣王廟六月己酉幸曲阜謁孔子廟既畢其所奠金花銀爐十數事留於祠所以備享遂幸孔林拜孔子墓墳側有石壇是唐朝封禪迴謁孔子之壇二百餘年間絕東封之禮洙泗之上無復鑾和之音帝以武功之餘枉車致敬尊師重道不亦優乎

文獻通考廣順二年六月以文宣王四十三代孫前曲

阜縣令孔仁玉復為曲阜縣令仍賜緋魚袋以亞聖顏  
淵裔孫顏涉為曲阜縣主簿仍敕兗州修葺祠宇墓側  
禁樵採時車駕親征兗州初平遂幸曲阜謁孔子祠既  
奠將致敬左右曰仲尼人臣無致敬之禮上曰文宣百  
代帝王師得無拜之即拜奠於祠前

胡氏寅曰人為諂諛趨利而不顧義者也孔子大聖  
途之人猶知之豈以位云乎如以位固異代之陪臣  
也如以道則配乎天地如以功則賢乎堯舜卒伍一

旦為帝王而以異代陪臣臨天下之大聖豈特趨利  
尊諛又無是非之心矣斯臣也當周太祖時以拜乳  
子為不可則當石高祖時必以拜契丹為可者是故  
君子有言天下國家所患莫甚于在位者不知學在  
位者不知學則其君不得聞大道則淺俗之論易入  
理義之言難進人主功德高下一係於此然則學乎  
學乎豈非君臣之急務哉

祖庭廣記周高祖親征慕容彥超至兗州城將破夜

夢一人狀甚魁異被王者服城陷取委巷入適夫子  
廟在帝豁然曰昨夢殆夫子乎不然何路與廟會因  
駐蹕升堂瞻像一如夢中所見感喜下拜

右五代

闕里志宋建隆三年詔祭文宣王用一品禮立十六戟  
於廟門仍詔用永安之曲

文獻通考太祖乾德四年以文宣王四十四代陵廟主  
進士孔宜為兗州曲阜縣主簿

太宗太平興國三年詔孔宜可授太子右贊善大夫襲封文宣公十月詔免兗州曲阜縣襲封文宣公家租稅先是歷代以聖人之後不預庸調周顯德中遣使均田遂抑為編戶至是孔氏訴於州以聞帝特免之

宋史真宗本紀景德四年五月兗州增二十戶守孔子墳八月辛亥賜文宣王四十六世孫聖佑同學究出身大中祥符元年十一月戊午幸曲阜縣謁文宣王廟服韡袍再拜幸叔梁紇堂近臣分奠七十二弟子遂幸孔



林加謚孔子曰元聖文宣王遣官祭以太牢給近便十戶奉塋廟賜其家錢三十萬帛三百匹以四十六世孫聖佑為奉禮郎近屬授官賜出身者六人

禮志大中祥符元年封泰山詔以十一月一日幸曲阜備禮謁文宣王廟內外設黃麾仗孔氏宗屬並陪位帝服韠袍行酌獻禮又幸叔梁紇堂命官奠七十二弟子先儒洎叔梁紇顏氏初有司定儀肅揖帝特展拜以表嚴師崇儒之意親製贊刻石廟中復幸孔林以樹擁道

降輿乘馬至文宣王墓設奠再拜詔追謚曰元聖文宣  
王祝文進署祭以太牢修飾祠宇給便近十戶奉塋廟  
仍追封叔梁紇為齊國公顏氏魯國夫人伯魚母卽官  
氏鄆國夫人

王圻續通考大中祥符元年十一月制曰王者順考古  
道懋建大猷崇四術以化民昭宣教本總百王而致治  
丕變人文方啟迪於素風思丕揚於鴻烈先聖文宣王  
道膺上聖體自生知以天縱之多能實人倫之先覺元

功侔乎簡易景鑠配乎貞明惟列辟以尊崇為億載之  
師表朕以寡昧欽承命歷曷嘗不遵守彛訓保乂中區  
屬以祇若元符告成喬嶽觀風廣魯之地飭駕數仞之  
牆躬詣遠祠緬懷遐躅仰明靈之如在肅奠獻以惟寅  
是用稽簡冊之文昭聰叡之德聿舉追崇之禮庶申嚴  
奉之心備物典章垂之不朽誕告多士昭示朕意宜追  
謚曰元聖文宣王

曲阜縣志大中祥符元年封聖考叔梁紇為齊國公聖

母顏氏為魯國太夫人制曰朕以祗陟岱宗新巡魯甸  
永懷先聖之德躬造闕里之庭奠獻周旋欽崇備至惟  
降靈之所自亦錫美之有初像設具存名稱斯闕宜加  
追命以煥典章叔梁紇宜追封齊國公顏氏宜追封魯  
國太夫人遣部官員外郎王勵精虔祭告追封聖配元  
官氏為鄆國夫人制曰朕巡行魯郡躬詣聖堂顧風教  
之所尊舉典章而既渥眷惟令淑作合聖靈載稽簡冊  
之文尚闕追崇之數屬茲咸秩特示追崇垂厥方來式

昭遺範元官氏宜追封鄆國夫人仍令兗州遣官詣曲阜祭告

宋史真宗本紀大中祥符五年十二月壬申改謚元聖文宣王曰至聖文宣王

禮志以國諱改謚至聖文宣王賜孔氏錢帛錄親屬五人並賜出身又賜太宗御製御書一百五十卷銀器八百兩

邱氏濬曰案真宗先詔有司檢討漢唐褒崇先聖故

事初欲追謚為帝或言宣父周之陪臣周止稱王不當加帝號故第增美名曰元聖蓋以春秋演孔圖曰孔子母感黑帝而生故曰元莊子曰恬澹元聖素王之道遂取以為稱嗚呼孔子之道非一言一義所可盡者謚之有無固不為之輕重況加之非聖之言既加之矣而又以犯其誕妄之祖之諱而改之哉

闕里志宋真宗東封王欽若言祭尼邱山上有紫雲氣長八九丈詔遣入內殿頭楊懷玉祭謝

天禧二年賜文宣公家祭冕服又賜行宮材修葺廟  
宇又敕兗州差兵士四十人員寮一人於本廟巡宿  
守護官物仍委轉運司於轄下有衣甲軍器處約度  
支於本廟

文獻通考天禧元年以文宣王四十六代孫光祿寺丞  
聖佑襲封文宣公

皇祐三年詔兗州仙源縣自國朝以來世以孔氏子孫  
知縣事使奉承廟祀近歲廢而不行非所以尊先聖也

今後宜復以孔氏子弟充選

宋史仁宗本紀至和二年三月丙子封孔子後為衍聖公

文獻通考集賢殿學士劉敞言據禮部員外郎直集賢院祖無擇奏伏見至聖文宣王四十七代孫孔宗愿襲封文宣公乃是其人未死已賜謚矣臣切觀前史孔子之後襲封者衆在漢魏則曰褒成褒聖宗聖在晉宋亦曰奉聖後魏曰崇聖北齊曰恭聖後周及



隋封以鄒國唐初曰褒聖或為君或為侯為公為大夫使奉祭祀惟漢平帝追謚孔子為褒成宣尼公遂以均為褒成君至唐開元二十七年追謚為文宣王又以其後為文宣公是皆以祖之美謚而加後嗣生而謚之不經甚矣欲乞明詔有司詳求古訓或封以小國或取尊儒褒聖之義別定美號加於封爵著於令式使千古之下無以加於我朝之盛典也奉聖旨送兩制詳議臣等謹案漢元帝初元元年以師孔霸

為關內侯食邑八百戶號褒成君而霸上書求奉孔子祭祀元帝下詔曰其令師褒成君關內侯霸以所食八百戶祀孔子及霸卒子福嗣福卒子房嗣房卒子莽嗣皆稱褒成君至平帝元始元年始更以二千戶封莽為褒成侯而追謚孔子曰褒成宣尼公以此觀之則褒成者國也宣尼者謚也公爵者爵也褒成宣尼公猶曰河間獻王云耳蓋推宣尼以為褒成祖非用褒成以為宣尼謚也唐世不深察此義而以褒

成為夫子之謚因疑霸等號封褒成皆襲其祖之舊耳故遂封夫子文宣王而爵其後文宣公考校本末甚失事理先帝既封泰山親祠闕里又加文宣以至聖之號則人倫之極致盛德之顯名盡在此矣尤非其子孫臣庶所宜襲處而稱之者也臣等以為無擇議是可用其文宣王四十七代孫孔宗愿伏乞改賜爵名若褒成奉聖之比上足以尊顯先聖有不可階之勢下不失優孔氏使得守繼世之業改唐之失法

漢之舊傳曰必也正名又曰正稽古立事可以永年  
此之謂也

闕里志慶歷中梁適知兗州乞以廂兵代廟戶又裁  
減人數方是時宰相章得象欲如其請參知政事范  
仲淹獨曰此事與尋常利害不同自是朝廷崇奉聖  
師美事仁義可息則此人數可減吾輩雖行他人必  
復之朝論遂已當時天下以此賢仲淹而鄙得象

文獻通考英宗治平元年詔勿以孔氏子弟知仙源縣

其襲封人如無親屬在鄉里令常任近便官不得遠去

家廟

京東提刑王綱乞慎重長民之官故有是詔

哲宗元祐元年朝議大夫孔宗翰辭司農少卿請依家世例知兗州以奉孔子祀從之宗翰又言孔子後襲封疏爵本為侍祠今乃兼領他官不在故郡請自今不使襲封之人更兼他職終身使在鄉里事下禮部太常寺

禮官議欲依所請釐定典禮命官以司其用度立學以訓其子孫襲封者專主祠事增賜田百頃供祭祀之餘

許均贍族人其差墓戶並如舊法賜書置教授一員教諭其家子孫鄉鄰或願從學者聽改行聖公為奉聖公及刪定家祭冕服等制度頒賜詔可

元符元年吏部言請下兗州於孔子家衆議承襲之人不必子繼所貴留意祖廟敦睦族人從之

高宗紹興八年詔衢州於係官田內撥賜五頃賜主奉先聖祠事襲封衍聖公孔玠以孔氏渡江子孫隔絕林廟故賜田以奉先聖蒸嘗也

二十四年以文宣王五十代孫搢補右承奉郎襲封衍聖公奉祀事

光宗紹熙四年以文宣王五十一代孫孔文遠為承奉郎襲封衍聖公

右宋

金史熙宗本紀天眷三年十一月癸丑以孔子四十九代孫璠襲封衍聖公奉孔子後

王圻續通考海陵天德二年二月初定襲封衍聖公俸

格有加於常品又加授承直郎

大定十六年詔立兗州學闕里廟宅子孫年十三以上入學者不限數

金史世宗本紀大定二十年十二月癸卯特授襲封衍聖公孔總為兗州曲阜令封爵如故

王圻續通考時召總至京師欲與之官尚書省奏總主先聖祀若加任使守奉有缺上曰然乃授曲阜縣令



章宗本紀明昌元年三月詔修曲阜孔子廟學二年  
四月詔襲封衍聖公孔元措視四品秩

王圻續通考章宗明昌三年四月詔曰衍聖公秩視  
四品階正八品不稱可超遷中議大夫永著於令元  
泰定三年山東廉訪使王鵬南言孔思誨襲爵上公  
階止四品於格弗稱且失尊崇意遂進階嘉議大夫  
三年十月壬子有司奏增修曲阜宣聖廟勅堯懷英撰  
碑文朕將親行釋奠之禮其檢討典故以聞十一月庚

午朔尚書省奏翰林侍讀學士党懷英舉孔子四十八代孫端甫年德俱高該通古學賜進士及第俟春暖召之

六年夏四月癸亥勅有司以增修曲阜宣聖廟工畢賜衍聖公以下三獻法服及登歌樂一部仍遣太常舊工往教孔氏子弟以備祭禮八月己未命兗州長官以曲阜新修廟告成於宣聖

闕里志襲封衍聖公奏朝廷稽考三代制禮作樂乞頒

降大樂許內族人及縣學生咸使肄習并乞降禮器以備釋奠及家祭使用至六年賜堂上正聲大樂一副禮器一副於闕里

金史章宗本紀承安二年二月特命襲封衍聖公孔元措世襲兼曲阜令

闕里志金泰和八年八月二十七日以先聖降誕之辰前期一日宗子率闔族敬祀尼山廟祭奠日方午刻俄聆殿上當空有樂振作皆金石絲竹之聲凡在

一舍間皆聞之駭然蓋德感所致金修正殿廊廡大  
中門大成門鄆國夫人殿自皇統大定以來建之其  
制猶質素至明昌初增後位夾殿殿廡皆以碧瓦為  
緣外柱以石刻龍為文其藻栱之飾塗以青碧每位  
皆有閣至於欄檻簾櫳並硃漆之齊國公僅與正位  
又叛二代三代祖殿毓聖侯五賢堂奎文閣之屬煥  
然一新與夫廳堂黌舍門廡凡四百餘楹方之前古  
於此為備

宣宗本紀貞祐三年十月召中奉大夫襲封衍聖公孔元措為太常博士上初用元措於朝或言宣聖墳廟在曲阜宜遣之奉祀既而上念元措聖人之後山東寇盜縱橫恐懼其害是使之奉祀而反絕之也故有是命

右金

元史太宗本紀五年六月詔以孔子五十一世孫元措襲封衍聖公十二月勅修孔子廟

八年三月復修孔子廟

闕里志太宗九年奉旨灑掃廟戶依舊一百戶奉上差法并行蠲免不係州縣所管

元史選舉志憲宗四年世祖在潛邸特命修理殿廷及即位賜之玉筆俾永為祭器

張德輝傳史天澤辟德輝為經歷官世祖在潛邸召見問曰孔子沒已久今其性安在對曰聖人與天地終始無往不在殿下能行聖人之道性即在是矣歲戊申春釋奠致胙於世祖世祖曰孔子廟食之禮何如對曰孔

子為萬代王者師有國者尊之則嚴其廟貌修其時祀  
其崇與否於聖人無所損益但以此見時君崇儒重道  
之意何如耳世祖曰今而後此禮勿廢

闕里志至元二年罷孔廟灑掃戶

王圻續通考曲阜孔子廟歷代給民百戶以供灑掃  
復其家至是尚書省以括戶之故盡收為民翰林學  
士王磐言林廟戶百家歲賦鈔不過六百貫僅比一  
六品官終年俸耳聖朝疆域萬里財賦歲億萬計豈

愛一六品官俸不以待孔子哉且於帑庫所損無多其損國體甚大時論韙之

元史世祖本紀至元四年正月癸卯勅修曲阜宣聖廟梁宜御賜尚醞釋奠記至元五年後己卯正月皇帝田於柳林以上丁在邇允御史臺奏因宣聖五十四代孫監察御史臣思立出上尊酒釋奠於闕里遣御史從事臣高元肅驛致之禮竟曲阜縣尹權祀事臣孔克欽言於宗黨曰茲誠罕有之盛典不識諸石罔



以昭後於是其宗人前湖廣行中書省都事臣思迪  
等屬臣宜記之宜延祐初科進士且嘗助教國子掄  
揚聖德職也遂不敢辭而諾之曰吾夫子沒魯哀公  
雖誅之而未極其尊漢高帝雖祀之而未盡其禮後  
代褒崇封爵之未悉其道詎若皇元累頒明詔既於  
至聖文宣王上加封以大成復於二丁永享以太牢  
重以香帛白金之錫帝心再三寅奉尊隆禮意淵博  
邁越古昔遠矣今憲臺擴弘緝典霑光祿之天釀以

備祖庭裡酌豈惟孔氏子孫有光實天下儒服之士  
舉有光也廼拜手稽首樂為之書

十三年以孔子五十三世孫曲阜縣尹孔治兼權主祀  
事十九年十一月襲封衍聖公孔洙入覲以為國子  
祭酒兼提舉浙東學校事就給俸祿與護持林廟匾書  
王圻續通考案孔子後自宋南渡初其四十八代孫  
端友子玠寓衢州元既平宋擬所立或言孔氏子孫  
寓衢者乃其宗子召洙赴闕洙遜於居曲阜者帝曰

寧違榮而不違親真聖人後也故有是命

閻子靜復曲阜廟碑畧曰聖上嗣服之初祇述祖考之成訓興學養士嚴祀宣聖自曲阜始明年元貞改元先聖五十三代孫密州尹治入朝璽書賜命中議大夫襲封衍聖公月俸有千秩視四品孔氏世爵弗傳者久至是乃復申命有司制考辟雍作廟於京師由是四方嚮風崇建廟學惟恐居後闕里祠宇燬於金季之亂閣號奎文若大中門闥存者無幾右轄嚴

公忠濟保魯嘗假清臺頒歷錢佐營繕之費歲戊申  
始復鄆國後寢以寓先聖顏孟十哲像至元丁卯衍  
聖公治尹曲阜主祀事將圖起廢奎文杏壇齋廳黌  
舍即其舊而新之禮殿則未遑也國初封建宗室畫  
濟兗單三州為魯國大長公主駙馬濟寧王分地置  
濟寧總管府屬縣十六曲阜其一也濟寧守臣阿勒  
坦布哈承詔旨會府尹僚佐鄉長者謀以廟役為任  
首出錢幣萬緡衆翕然助之傭工僱力市木於河輦

石於山掄材於野采棟樑榑楹礎之屬悉具又得泗水渠堰積石數百石堊稱是露階銘砌咸足用焉郡政之暇躬為督視甄陶鍛冶丹雘髹漆以致工師廩積各有司存經始於大德二年之春屬歲祲中止續事於五年之秋不期月而告成殿壘重簷亢以層基繚以修廊大成有門七十二賢有廡泗沂二公有位黼座既遷更塑鄆國像於後寢締構堅貞規模壯麗大小以楹計者百二十有六貲用以緡計者十萬有

奇落成之日遠近助祭者衣冠輻輳衆庶瞻顙千禩  
祖庭頓還舊觀於是衍聖公治遣其子曲阜令思誠  
奉表以聞且以廟碑為請會選胄子入學擢思誠國  
子監丞特勅中書賜田五千畝以供粢盛戶二十八  
以應灑掃仍下翰林書其事於石臣復承命踴躍既  
述興造始末竊惟聖元神武造邦天兵傳汴戎事方  
殷不忘先聖之祀詔令五十一代孫衍聖公元措歸  
魯哀集奉常禮樂於兵燼之餘燕翼之謀肇於此矣

世祖聖德神功文武皇帝仁沾義洽九域混同文物  
煥然可觀內立國學外置郡邑學官而於先聖之後  
尤所注意遴選師儒訓迪作成需賢以嗣封爵茲志  
未究皇上繼而行之用能培植教本光昭先業以致  
魯國臣民思樂泮水如附靈臺子來之衆至矣哉觀  
文化下必世後仁之效豈特震耀一時實宗社無疆  
之福也

闕里志大德五年復給灑掃二十八戶從衍聖公孔治

之請也

元史成宗本紀大德七年閏五月壬戌詔禁犯曲阜陵廟者冬十月給大都文宣王廟灑掃戶五

王圻續通考大德九年給曲阜林廟灑掃戶以尚珍署田五十頃供歲祀

元史仁宗本紀至大四年閏七月辛丑命國子祭酒劉賡詣曲阜以太牢祀孔子

祭祀志闕里之廟始自太宗三年令先聖五十一代孫



襲封衍聖公元措修之官給其費而代祠之禮則始於  
武宗牲用太牢禮物別給白銀一百五十兩綵幣表裏  
各十有三匹四年冬復遣祭酒劉賡往祀牲禮如之延  
祐之末泰定天歷初載皆循是典錦幣雜綵有加焉  
闕里志延祐七年詔以白金一百五十兩綿綺雜綵表  
裏各一十三段遣說書王存義詣魯以太牢祀孔子仁  
宗手香加額以授之

元史英宗本紀至治二年春正月戊寅勅有司卹孔氏

子孫貧乏者

泰定帝紀至治三年十一月癸丑遣使詣曲阜以太牢

祀孔子

文宗本紀天歷二年二月癸巳遣翰林侍讀學士曹元  
用祠孔子於闕里

至順元年冬十月戊申降璽書申飭衍聖公崇奉孔子  
事

至順二年七月藝文少監歐陽元言先聖五十四代孫

襲封衍聖公爵最五等秩登三品而用四品銅印於爵秩不稱詔鑄從三品印給之

王圻續通考至順三年二月詔修曲阜宣聖廟先是  
仞官夫人神座下生木芍藥一本見者異之而修廟  
令下

順帝元統元年令浙江行省範銅造和寧宣聖廟祭  
器凡百三十有五事

順帝本紀至元元年五月遣使詣曲阜孔子廟致祭

四年正月詔修孔子廟 五年勅賜曲阜宣聖廟碑  
六年十一月辛未以孔克堅襲封衍聖公

至正二年十月壬戌遣官致祭於曲阜 八年七月乙  
卯遣使祀曲阜孔子廟 十五年十月以襲封衍聖公  
孔克堅同知太常禮儀院事以克堅子希學襲封衍聖  
公 十六年二月己卯令集賢直學士楊俊民致祭曲  
阜孔子廟仍葺其廟宇

右元

王圻續通考洪武二年遣使詣曲阜致祭曲阜孔子故里也使者陸辭太祖諭之曰仲尼之道廣大悠久與天地相並故後世有天下者莫不致敬盡禮修其祀事朕今為天下主期在明教化以行先聖之道今既釋奠國學仍遣爾修祀事於闕里爾其敬之

大明集禮洪武二年遣官降香致祭曲阜孔子御製祝文曰惟神昔生周天王之國實居魯邦聖德天成述紀前王治世之法雖當時列國鼎峙其道未行垂教於後

以至於今凡有國家大有得焉自漢之下以神通祀海  
內朕代前王統率庶民目書檢點忽覩神之訓言非其  
鬼而祭之諂也敬鬼神而遠之祭之以禮此非聖賢明  
言他何能道故不敢通祀暴殄天物以累神之聖德茲  
以香幣牲齊粢盛庶品式陳明薦惟神鑒焉

明史太祖本紀洪武二年八月衍聖公襲封及授曲阜  
知縣並如前代制

七年二月戊午修曲阜孔子廟設孔顏孟三氏學

十八年十月甲辰詔曰孟子傳道有功名教歷年既久  
子孫甚微近有以罪輸作者豈禮先賢之意哉其加意  
詢訪凡聖賢後裔輸作者皆免之

闕里志洪武二十九年上謂工部右侍郎秦逵曰春秋  
之時人紀廢壞孔子以至聖之資刪述六經使先王之  
道晦而復明萬世永賴功莫大焉夫食粟則思樹藝之  
先衣帛則思蠶繅之始皆重其所從出也孔子之功與  
天地並立故朕命天下通祀以致崇報之意而闕里又

啟聖降神之地廟宇廢而不修將何以安神靈詔來世爾工部其即為修理以副朕懷

洪武初奉詔修孔廟至永樂十四年又撤其故而新之是年遣官祭闕里

宣德元年宣宗皇帝登極遣太常寺丞孔克準詣闕里祭告自先師而下四配十哲兩廡凡九壇俱用太牢

正統元年英宗皇帝登極遣國子監司業趙琬詣闕里祭告



景泰元年景帝登極遣翰林院侍講吳節以香帛詣闕里祭告

天順元年英宗復位遣工科左給事中孫昱詣闕里祭告

成化元年憲宗皇帝登極遣吏部右侍郎尹旻詣闕里祭告又駕幸太學釋奠孔子遣官取衍聖公弘緒并三氏子孫赴京觀禮命衍聖公分獻沂國公此遣官欽取之始

弘治元年孝宗皇帝登極遣太常寺少卿田景賢詣闕  
里祭告

明通紀弘治六年命孔彥繩為翰林世襲五經博士主  
衢州孔子廟祀

明史孝宗本紀弘治十二年六月曲阜先師廟災遣使  
慰祭

明通紀十二年曲阜孔廟火題准取旁近各省及各抽  
分廠銀重修

兗州府志闕里至聖廟災遣翰林侍讀學士李傑祭告  
出帑金十五萬兩命守臣重建

明史孝宗紀弘治十七年閏四月闕里先師廟成遣大  
學士李東陽祭告

闕里志正德十六年詔有司改建孔氏家廟廟在衢州  
者官給錢董其役令博士孔承義奉祀

嘉靖元年世宗皇帝登極遣吏部尚書石瑤詣闕里祭  
告

隆慶元年穆宗登極遣尚寶司卿劉奮庸詣闕里祭告  
萬歷元年神宗登極遣尚寶司司丞張孟男詣闕里祭  
告

天啟元年熹宗皇帝登極遣順天府府丞姚士慎詣闕  
里祭告

右明

五禮通考卷一百二十一

欽定四庫全書

五禮通考卷一百二十二

刑部尚書秦蕙田撰

吉禮一百二十二

功臣配享

蕙田案配享之典國家所以報功而勸忠也  
周禮祭于大烝並及禘祫後世不廢焉

書盤庚茲予大享于先王爾祖其從與享之

傳古者天子錄功臣

配食于廟大享烝嘗也 疏此大享于先王謂天子祭宗廟也言古者天子錄功臣配食于廟故臣之先祖得與享之也古者孔氏據已而道前世也此殷時已然矣大享烝嘗者烝嘗是秋冬祭名謂之大享者以事各有對若烝嘗對禘祫則禘祫為大烝嘗為小若四時自相對則烝嘗為大禘祫為小知烝嘗有功臣與祭者案周禮司勳云凡有功者銘書于王之太常祭于大烝司勳詔之是也秋冬之祭尚及功臣則禘祫可知近代以來惟禘祫乃祭功臣配食時祭不及之也近代以來功臣配食各配所事之君若所事之君其廟已毀時祭不祭毀廟其君尚不時祭其臣固當止矣禘祫則毀廟之主亦在焉其時功臣亦當在也

陳氏大猷曰大勳勞之人方得配食非徧及有功者

蕙田案周禮祭于大烝之文則知大享專指

烝而不及嘗矣蓋烝嘗同為大享而烝尤大  
于嘗故報功臣焉注兼烝嘗恐非

詩商頌長發允也天子降于卿士實惟阿衡實左右商  
王

蘇氏轍曰大禘之祭所及者遠卿士伊尹蓋與祭于  
禘者也商書曰茲予大享于先王爾祖其從與享之  
是禮也豈其起  
于商之世歟

孔叢子書曰茲予大享于先王爾祖其從與享之季  
桓子問曰此何謂也孔子曰古者大臣有功死則必

祀之于廟所以殊有績勸忠勤也盤庚舉其事以厲其世臣故稱焉桓子曰天子之臣有大功者則既然矣諸侯之臣有大功者可以如之乎孔子曰勞能定國功加於民大臣死難雖食之公廟可也桓子曰其位次如何孔子曰天子諸侯之臣生則有列于朝死其有位於廟其序一也

書洛誥周公曰王肇稱殷禮祀于新邑咸秩無文予齊百工俾從王于周予惟曰庶有事今王即命曰記功宗以



功作元祀惟命曰汝受命篤弼

傳言王當始舉殷家祭祀以禮典祀于新邑皆

次秩不在禮文者而祀之我整齊百官使從王于周行其禮典我惟曰庶幾有善政事今王就行王命于洛邑

曰當記人之功尊人亦常用功大小為序有大功則列大祀謂功施于民者惟天命我周邦汝受天命厚矣當

輔大天命視羣臣有功者記載之乃汝新即政其當盡自教衆官躬化之疏君知臣功則臣皆盡力

蔡氏沈曰殷盛也與五年再殷祭之殷同功宗功之

尊顯者蓋功臣皆祭于大烝而勲勞之最尊顯者則

為之冠故謂之元祀周公教成王即命曰記功之尊

顯者以功作元祀矣又惟命之曰汝功臣受此褒賞

之命當益厚輔王室蓋作元祀既以慰答功臣而又勉其左右王室益圖久大之業也

蕙田案注疏以記功宗為記人之功尊人蔡氏以為記有功之尊顯者二說不同蔡義為長

周禮夏官司勲王功曰勲注輔成王業若周公國功曰功注保全國家若伊尹民

功曰庸注施于民若后稷事功曰勞注以勞定國若禹治功曰力注制法成治若咎繇戰

功曰多注剋敵出奇若韓信陳平司馬法曰上多前虜凡有功者銘書于王之太常祭

于大烝司勲詔之

注銘之言名也生則書于王旌以識其人與功也死則于烝先王祭之詔

謂告其神以辭也盤庚告其卿大夫曰茲予大享于先王爾祖其從與享之是也今漢祭功臣于廟庭疏也

祭功臣在冬之烝祭者烝者衆也冬時物成者衆故祭功臣案彼書注以大享為烝嘗者此舉冬祭物成者衆而言其嘗時亦祭之也或周時直于烝時祭功臣殷時烝嘗俱祭禮異故也

蕙田案疏謂周於烝祭祭功臣殷於烝嘗皆

祭功臣此亦無可考

鄭氏鈔曰王功者輔成王業勤勞王室輔幼孤以嗣王者之緒明王道以成王者之治即是功而謂之勲勲有薰烝之義謂其功之大薰烝宇宙上達于王也周公之有大勲勞是已國功者國爾忘家盡瘁國事

凡所施為無非為國計者即是功而謂之功功首事  
有成效之義獨此名曰功蓋人臣立功正以保金王  
國為主進而上名以勲功不足道也抑而下則曰勞  
曰力之類皆不足正名其功也惟為國而有成者正  
可謂之功民功者害為民除之利為民興之或便于  
昔而不便於今則為民革之或興于前而廢于後則  
為民舉之即是功而謂之庸庸者用也事功者或從  
王事或任國事或有所營為或有所創制龜勉從之  
不畏其適我也即是功而謂之勞勞有經營艱苦之  
意也治功者或平水土或開草萊或任土地或疏導  
溝洫即是功而謂之力力謂其用力以作為也戰功  
者戰以伐謀為上而以伐兵為下以正合以奇勝執  
倖折馘斬將奪旗奏凱而旋者是也即  
是功而謂之多者算數過人之義

又曰太常之書司常之職也大祭之祭大宗伯之職  
也司勲知立功之人當銘則詔之使銘當祭則詔之

使祭銘于太常使與日月同其久也祭于大烝使與祖宗之神同享乎盛祭也可以見其報之之厚

### 蕙田案詔字當以鄭氏鐸之說為長

王氏昭禹曰必使司勳詔之則以有大功者其貳藏于司勳故也

王氏安石曰大烝冬之大享當是時百物皆報焉祭有功宜矣

春秋定公十四年左氏傳梁嬰父惡董安于謂知文子曰不殺安于使終為政于趙氏趙氏必得晉國盍以其先發難也討于趙氏文子使告于趙孟曰范中行氏雖信為亂安于則發之是安于與謀亂也晉國有命始禍

者死二子既伏其罪矣敢以告趙孟患之安于曰我死而晉國寧趙氏定將焉用生人誰不死吾死莫矣乃縊而死趙孟尸諸市而告於知氏曰主命戮罪人安于既伏其罪矣敢以告知伯從趙孟盟而後趙氏定祀安于

於廟

注趙氏廟云凡有功名者

疏禮臣有大功配食于廟周禮司勳

詔之尚書盤庚云茲予大享于先王爾祖其從與享之孔安國云古者天子饗功臣配食于廟大享烝嘗也天子既有此禮諸侯或亦有之今趙氏祀安于於趙氏之廟其意亦如此也

蕙田案觀孔叢子所載孔子與季桓子問答

語則知自定公以前諸侯之國無有以臣配  
享者故孔穎達云諸侯或亦有之然則以家  
臣而祀于私廟僭禮自趙簡子始也

右經傳功臣配享

漢舊儀宗廟祭功臣四十人食堂下惟御僕滕公祭於  
廟門外塾

杜佑通典漢制祭功臣于庭生時侍讌于堂死則降在  
庭位與士庶為列

三國魏志明帝本紀青龍元年夏五月壬申詔祀故大將軍夏侯惇大司馬曹仁車騎將軍程昱于太祖廟庭注魏書載詔曰昔先王之禮於功臣存則顯其爵祿沒則祭于大烝故漢氏功臣祀于廟庭大魏元功之臣功勲優著終始休明者其皆依禮祀之于是以惇等配享之

齊王本紀正始四年秋七月詔祀故大司馬曹真曹休征南大將軍夏侯尚太常桓階司空陳羣太傅鍾繇車



騎將軍張郃左將軍徐晃前將軍張遼右將軍樂進太尉華歆司徒王朗驃騎將軍曹洪征西將軍夏侯淵後將軍朱靈文聘執金吾臧霸破虜將軍李典立義將軍龐德武猛校尉典韋于太祖廟庭

五年冬十一月癸卯詔祀故尚書令荀攸于太祖廟庭注臣松之以為故魏氏配享不及荀彧蓋以其末年異議又位非魏臣故也至于升程昱而遺郭嘉先鍾繇而後荀攸則未詳厥趣也徐佗謀逆而許褚心動

忠義之至遠同于日碑且潼關之危非褚不濟褚之功烈有過典韋今祀韋而不及褚又所未達也

六年冬十一月祫祭太祖廟始祀前所論佐命臣二十一人

嘉平三年十一月有司奏諸功臣應享食于太祖廟者更以官為次太傅司馬宣王功高爵尊最在上

陳留王本紀景元三年詔祀故軍諮祭酒郭嘉于太祖廟庭

通典魏高堂隆議曰案先典祭祀之禮皆依生時尊卑之叙以為位次功臣配享于先王像生時侍讌燕禮大夫以上皆升堂以下則位于庭其餘則與君同牢至於俎豆薦羞唯君備公降于君卿大夫降于公士降于大夫使功臣配食于烝祭所以尊崇其德明其勲以勸嗣臣也議者欲從漢氏祭之于庭此為貶損非寵異之謂也貴者取貴骨賤者取賤骨今使配食者因君之牢以貴賤為俎庶合事宜周志曰勇則害上不登于明堂共

用謂之勇言有勇而無義死不登堂而配食此即配食之義位在堂之明審也下為北面三公朝立之位耳燕則脫屣升堂不在庭也凡獻爵有十二九七五三之差君禮大夫三獻太祝令進三爵于配食者可也

蕙田案左傳勇則害上不登于明堂杜注云明堂祖廟也所以策功序德故不義之士不得升孔疏云鄭元以為明堂在國之陽與祖廟別處左氏舊說及賈逵盧植蔡邕服虔等

皆以祖廟與明堂為一故杜同之祭統云古者明君必賜爵祿于太廟傳稱公行還告廟舍爵策勲是明堂之中所以策功序德故不義之人不得升之也據注疏二家是謂生而入廟受賞耳魏高堂隆則以為登堂配食乃指死後而言今案狼睥前則曰吾未得死所後則曰死而不義非勇也是引周志之言明指死後審矣高堂隆在杜預以前釋經必有

所依據也

右漢魏

晉書武帝本紀咸寧元年八月壬寅以故太傅鄭冲太尉荀顗司徒石苞司空裴秀驃騎將軍王沈安平獻王孚等及太保何曾司空賈充太尉陳騫中書監荀勗平南將軍羊祜齊王攸等皆列于銘享

文獻通考散騎常侍任茂議案魏功臣配食禮叙六功之勲祭陳五祀之品或祀之于一代或傳之于百代盖

社稷五祀所謂傳之於百代者古之王臣有明德大功  
若勾龍之能平水土柱之能樹百穀則祀社稷異代不  
廢也昔湯既勝夏欲遷其社不可乃遷稷而周棄德可  
代柱而勾龍莫廢也若四叙之屬分主五方則祀為貴  
神傳之異代載之春秋非此之類則雖明如咎繇勲如  
伊尹功如呂尚各於當代祀之不祭于異代也然則伊  
尹于殷雖有王功之茂不配食于周之清廟矣今之功  
臣論其勲蹟比咎繇伊尹呂尚猶或未及凡云配食各

配食于主也今主遷廟臣宜從享大司馬石苞等議魏代功臣宜歸之陳留國使修常祀允合事理

宋書長沙景王傳太祖元嘉九年詔曰古者明王經國司勲有典平章以馭德刑班瑞以酬功烈銘徽庸于鼎彝配祫祀于清廟是以從享先王義存商誥祭于大烝禮著周典自漢迄晉世崇其文王猷既昭幽顯咸秩先皇經緯天地撥亂受終駿命爰集光宅區宇雖聖明淵運三靈允協抑亦股肱翼亮之勤祈父宣力之効故使



持節侍中都督南徐兖二州揚州之晉陵京口諸軍事  
太傅南徐兖二州刺史長沙景王故侍中大司馬臨川  
烈武王故司徒南康文宣公穆之侍中衛將軍開府儀  
同三司錄尚書事揚州刺史華容縣開國公弘使持節  
散騎常侍都督江州豫州西陽新蔡晉熙四郡軍事征  
南大將軍開府儀同三司江州刺史永修縣開國公道  
濟故將軍青州刺史龍陽縣開國侯鎮惡或履道廣流  
秉德冲邈或雅景高邵風鑒明遠或識唯知正才畧開

邁咸文德以熙帝載武功以隆景業固以侔蹤姬旦方軌伊召者矣朕以寡德纂成鴻緒每惟道勲思遵令典而太常未銘從祀尚闕鑒寐欽屬永言深懷便宜敬是前式憲茲嘉禮勒功天府配祭廟庭俾示徽章垂美長世茂績遠猷永傳不朽

南齊書禮志永明十年詔故太宰褚淵故太尉王儉故司空柳世隆故驃騎大將軍王敬則故鎮東大將軍陳顯達故鎮東將軍李安民六人配享太祖廟庭祠部郎

何誣之議功臣配享累行宋世檢其遺事題列坐位具書贈官爵謚及名文不稱主便是設板也白虎通云祭之有主孝子以繫心也揆斯而言升配廟庭不容有主宋時板度既不復存今之所制大小厚薄如尚書召板為得其衆有司攝太廟舊人亦云見宋功臣配享坐板與尚書板相似

隋書禮儀志武帝即位遷主太廟春祠夏禘秋嘗冬烝并臘一歲凡五謂之時祭三年一禘五年一祫謂之殷

祭禘以夏禘以冬皆以功臣配天監三年何佟之議曰  
禘於首夏物皆未成故為小禘於秋冬萬物皆成其禮  
尤大司勲列功臣有六皆祭于大烝知禘尤大乃及之  
也近代禘祫並不及功臣有乖典制宜改詔從之自是  
祫祭乃及功臣

陳書文帝本紀天嘉二年九月甲寅詔曰姬業方闡望  
載渭濱漢歷既融道通圯上若乃擣精辰宿降靈惟岳  
風雲有感夢寐是求斯固每楫鹽梅遞相表裏長世建

國罔或不然至于銘德太常從祀清廟以貽厥後來垂  
諸不朽者也前皇經濟區宇裁成品物靈貺式甄光膺  
寶命雖謨明濬發幽顯協從亦文武賢能翼宣王業故  
大司馬驃騎大將軍瑱故司空文育故平北將軍開府  
儀同三司僧明故中護軍穎故領軍將軍擬或締構艱  
難經綸夷險或摧鋒冒刃殉義遺生或宣哲協規綢繆  
帷幄或披荆汗馬終始勤劬莫不罄誠悉力屯泰以之  
朕以寡昧嗣膺丕緒永言勲烈思弘典訓便可式遵故

實載揚盛軌可並配食高祖廟庭俾茲大猷永傳宗祏  
世祖本紀天嘉五年三月壬午詔以故護軍將軍周鐵  
虎配食高祖廟庭

周鐵虎傳天嘉五年世祖又詔曰漢室功臣形寫宮  
觀魏朝猛將名配宗祧功烈所以長存世代因之不  
朽故侍中護軍將軍青冀二州刺史沌陽縣開國侯  
鐵虎誠節鯁亮力用雄敢王業初基行間累及垂翅  
賊壘正色寇庭古之遺烈有識同壯隕身不屈雖隆

榮等營魂易遠言追嘉惜宜仰陪壻寢恭頒享奠可  
配食高祖廟庭

宣帝本紀大建四年秋九月景寅以故太尉徐度儀同  
杜稜儀同程靈洗配食高祖廟庭故車騎將軍章昭達  
配食世祖廟庭

右晉宋齊梁陳

伽藍記北魏廣陵王即皇帝位爾朱世隆加儀同三司  
尚書令東平王餘官如故贈太原王相國晉王加九錫

立廟于芒嶺首陽山上舊有周公廟世隆欲以太原王  
功比周公故立此廟廟成為火所災有一柱焚之不盡  
後三日雷雨震電霹靂擊為數段柱下石及廟瓦皆碎  
于山下復命百官議太原王配享司直劉季明議云不  
合世隆問其故季明曰若配世宗於宣武無功若配孝  
明親害其母若配莊帝為臣不忠為莊帝所戮以此論  
之無所配也世隆怒曰卿亦合死季明曰下官既為議  
臣依禮而言不合聖心俘翦惟命議者咸歎季明終得



無恙

北齊書孝昭帝本紀皇建元年十一月庚申詔以故太師尉景故太師竇泰故太師太原王婁昭故太宰章武王庫狄干故太尉段榮故太師万俟普故司徒蔡儁故太師高乾故司徒莫多婁貸文故太保劉貴故太保封祖裔故廣州刺史王懷十二人配享太祖廟庭故太師清河王岳故太宰安德王韓軌故太宰扶風王可朱渾道元故太師高昂故大司馬劉豐故太師万俟受洛干

故太尉慕容紹宗七人配享世宗廟庭故太尉河東王  
潘相樂故司空薛修義故太傅破六韓常三人配享顯  
祖廟庭

北周書明帝本紀二年冬十二月癸亥太廟成辛巳以  
功臣琅琊貞獻公賀拔勝等十三人配享太祖廟庭

右北魏北齊北周

隋書禮儀志禘祫之月則停時饗而陳諸瑞物及伐國  
所獲珍奇于廟庭及以功臣配饗

舊唐書太宗本紀貞觀十四年冬十月己卯詔以贈司空河間元王孝恭贈陝東道大行臺尚書右僕射鄖節公殷開山贈民部尚書渝襄公劉政會等配享高祖廟庭

通典貞觀十六年有司言禮功臣配享于廟庭禘享則不配依令禘祫之日功臣並得配享請集禮官學士等議太常卿韋挺等議曰古者臣有大功享祿其後子孫率禮潔粢豐盛祔祠烝嘗四時不輟國家大祫又得配

焉所以昭明其勲尊崇其德以勸嗣臣也其禘及時享  
功臣皆不應享故周禮六功之官皆配大烝而已先儒  
皆以大烝為祫祭梁初誤禘功臣左丞何佟之駁議武  
帝允而依行降暨周齊俱遵此義竊以五年再殷合諸  
天道之大小小則人臣不與大則兼及有功禮禘無配  
功臣誠謂理不可易從之

顏師古功臣配享議曰竊以肅恭禋祀經邦彛訓追  
遠念功歷代鴻典於穆清廟備孝享于古蠲股肱良

哉豫銘常之配侑爰發明詔俾命率由秩宗致請博  
謀僚列爾雅說祀禘為大祭公羊傳義大事為祫何  
休所釋又異鄭元然皆一配之文曾無重祀之證是  
非衆論雖曰踳駁隆殺二端厥趣可覩謹案祫者合  
食禘乃禘祭禘小于祫理則非疑商書稱從與其大  
享周禮著祭于大烝是知小祀不及功臣其事又無  
可感魏晉以降莫不通行中間雖經差失梁朝又以  
矯正有齊立號朝宗河朔周氏命歷卜食咸陽修定

禮儀皆有憑據同遵此典未嘗釐革今欲更改實謂  
非宜又尋古之配祭皆在于冬據其時月益明非禘  
況乎臣之立功各因所奉享祀之日從主升配禘之  
為祭自于本室廟未毀者不至太祖之庭君既不來  
而臣獨當祀列對揚尊極乃非所宜今請祫配功臣  
禘則不豫依經合義進退為允謹議

蕙田案禘祭無配享其禮極是特所謂禘者  
非古之禘耳

文獻通考唐太宗貞觀禮祫享功臣配享于廟庭禘享則不配後又令祫禘之日功臣並得配享初太常卿韋縉等議功臣祫享之日配享于廟庭禘及時享則皆不預其議遂行至開元初復令禘之日亦皆配享非舊典也配享位在各帝廟庭太階之東少南西向以北為上舊唐書高宗本紀貞觀二十三年皇太子即位九月丙寅贈太尉梁國公玄齡贈司徒申國公士廉贈左僕射蔣國公屈突通並配食太宗廟庭

顯慶五年二月甲午祀舊宅以武士護殷開山劉政會  
配食

中宗本紀神龍二年閏二月停許敬宗配享以贈太尉  
鄭公魏徵配享太宗廟

玄宗本紀開元六年六月乙酉制以故侍中桓彥範敬  
暉故中書令兼吏部尚書張柬之故特進崔玄暉故中  
書令袁恕已配享中宗廟庭故司空蘇瓌故左丞相太  
子少保柳州刺史劉幽求配享睿宗廟庭



文獻通考順宗既薨議祧遷中宗廟有司疑曰五王有  
安社稷功若遷中宗則配享永絕判集賢院事蔣乂曰  
禘祫功臣乃合食太廟中宗廟雖毀而禘祫並陳太廟  
此則五王配食與初一也由是遷廟遂定

開元禮祫禘以功臣配享享日未明一刻太廟令布功  
臣神座于太廟之庭吏部尚書贈司空鄆國公殷開山  
光祿卿渝國公劉政會開府儀同三司淮安靖王神通  
禮部尚書贈司空河間元王孝恭配享高祖廟庭太階

之東少南西向以北為上司空贈太尉梁國文昭公房  
玄齡特進贈司空鄭國文貞公魏徵洛州都督贈尚書  
左僕射蔣國忠公屈突通開府儀同三司贈司徒申國  
文獻公高士廉配享太宗廟庭少南西向以北為上司  
空太子太師贈太尉英國貞武公李勣中書令贈尚書  
右僕射高唐縣公馬周尚書左僕射兼太子少傅北平  
縣公張行成配享高宗廟庭少南西向以北為上侍中  
譙國公桓彥範侍中平陽郡公敬暉中書令兼吏部尚

書濮陽郡公張柬之特進博陵郡公崔玄暉中書令南陽郡公袁恕已配享中宗廟庭少南西向以北為上尚書左僕射太子少傅贈司空許國文貞公蘇瓌尚書左丞相太子少保徐國公劉幽求配享睿宗廟庭少南西向以北為上諸座各設版于座首其版文各具題官爵姓名每座各設壺罇二于左北向玄酒在西加勺罍置爵于罇下設洗于終獻罍洗東南北向太廟令與良醢令以齊實罇如常堂上設饌訖太官令帥進饌者出奉

饌入祝迎引于座左各設於座前太官令以下出祝還  
罇所亞獻將畢贊引引獻官詣罍洗盥手洗爵詣酒罇  
所執罇者舉罇獻官酌酒諸助奠者皆酌酒訖贊引引  
獻官進詣首座前東面奠爵贊引引還本位于獻官進  
奠諸助奠者各進奠于座還罇所于堂上徹豆祝進首  
座前徹豆還罇所

舊唐書禮儀志舊儀高祖之廟則開府儀同三司淮安  
王神通禮部尚書河間王孝恭陝東道大行臺右僕射

鄆國公殷開山吏部尚書渝國公劉政會配饗太宗之  
廟則司空梁國公房玄齡尚書右僕射萊國公杜如晦  
尚書左僕射申國公高士廉配饗高宗之廟則司空英  
國公李勣尚書左僕射北平縣公張行成中書令高唐  
縣公馬周配饗中宗之廟則侍中平陽郡王敬暉侍中  
扶陽郡王桓彥範中書令南陽郡王袁恕已配饗睿宗  
之廟則太子太傅許國公蘇環尚書左丞相徐國公劉  
幽求配饗天寶六載太廟配饗功臣高祖室加裴寂劉

文靜太宗室加長孫無忌李靖杜如晦高宗室加褚遂良高季輔劉仁軌中宗室加狄仁傑魏元忠王同皎等十一人

文獻通考高祖廟六人神通殷開山劉政會並貞觀十四年十月十五日勅武士彠顯慶四年三月七日勅文

明元年停裴寂劉文靖並天寶六載正月十三日勅開元禮無

武士彠裴寂劉文靜太宗廟七人房玄齡高士廉屈突通並貞觀二

十三年九月二十四日勅至永徽四年二月房玄齡以

子遺愛反停配享魏徵神龍二年閏二月十五日勅長

孫無忌李靖杜如晦並天寶六載正月十二日勅開元禮無長孫

無忌李靖杜如晦高宗廟六人李勣張行成許敬宗馬周並垂拱

二年正月十一日勅其許敬宗神龍二年閏二月一日

有勅停褚遂良高季輔劉仁軌並天寶六載正月十二

日勅開元禮無許敬宗褚遂良高季輔劉仁軌中宗廟八人桓彥範敬暉張柬之

崔玄暉袁恕已並開元六年六月二十二日勅狄仁傑

魏元忠王同皎並天寶六載正月十二日勅開元禮無狄仁傑魏元忠王同皎

睿宗廟二人蘇瓌劉幽求並開元六年六月二十三日  
勅

蕙田案舊唐書於配享太宗諸臣前既以杜  
如晦列於其中後於所加諸臣內又復列入  
杜如晦故沈炳震曰如晦已經配享太宗此  
云加誤但檢文獻通考貞觀二十三年勅有  
屈突通而無杜如晦至天寶六載始與長孫  
無忌李靖同加入則舊唐書後所云加入杜



如晦乃不誤而所誤在前之以屈突通為杜  
如晦也沈炳震想未見通考故反以加為誤  
耳 又案文獻通考高祖配享有武士護太  
宗配享有魏徵中宗配享有張柬之崔玄暉  
舊唐書志俱不載其武士護配而旋停姑置  
弗論餘皆作志之漏畧也

玄宗廟三人贈太師燕文正公張說贈太子太師代國  
公郭元振中書令趙國公王琚

檢年月未獲

肅宗廟二人贈太

師韓文憲公苗晉卿大歷四年十月十七日勅贈太尉  
冀獻穆公裴冕元和四年八月勅

唐書裴冕傳始肅宗廟惟苗晉卿配享冕卒後二十  
餘年有蘇正元者奏言肅宗為元帥時師繞一旅冕  
於草創中甄大義以勸進收募驍勇幾十餘萬既逾  
月房琯來又一年而晉卿至今晉卿從祀而冕乃不  
與有詔冕配享肅宗廟

代宗廟一人贈太尉汾陽忠武王郭子儀建中二年十

一月勅德宗廟三人贈太師西平忠武王李晟贈太尉  
忠烈公段秀實並元和四年八月勅贈太師忠武公渾  
瑊元和四年九月四日勅憲宗廟四人贈司徒宣懿公  
杜黃裳贈太師裴度會昌六年十月勅贈司徒威武公  
高崇文贈太師李愬會昌六年十一月勅

王海宣宗大中四年五月宗正少卿李從易奏自武德  
以來功臣列在祀典者三十八人

文獻通考後唐明宗長興二年詔以故昭義節度使李

嗣昭故幽州節度使周德威故汴州節度使符存審配  
享莊宗廟庭

右隋唐五代

宋史真宗本紀咸平二年二月丙申以趙普配享太祖  
廟庭八月乙亥以太師贈濟陽郡王曹彬配享太祖廟  
庭司空贈太尉中書令薛居正忠武軍節度使贈中書  
令潘美右僕射贈侍中石熙載配享太宗廟庭

禮志咸平二年始詔以趙普配享太祖廟庭繼以宋白

等議又以曹彬配享太祖以薛居正石熙載配享太宗  
廟庭仍奏告本室禘祫皆配之祠日有司先事設幄次  
布褥位于廟庭東門內道南當所配室西向設位板方  
七寸厚一寸半籩豆各二簋簋俎各一知廟卿奠爵再  
拜

趙普傳真宗咸平二年詔曰故太師贈尚書令追封  
韓王趙普識冠人彞才高王佐翊戴興運光啟鴻圖  
雖呂望肆伐之勲蕭何指蹤之効殆無以過也自輔

弼兩朝周旋三紀茂巖廊之碩望分屏翰之劇權正直不回始終無玷謀猷可復風烈如生宜頒享于大烝永同休于宗祏茲為茂典以答舊勲其以普配享太祖廟庭

乾興元年詔從翰林禮官參議以右僕射贈太尉中書令李沆贈太師尚書令王旦忠武軍節度使贈中書令李繼隆配享真宗

嘉祐八年詔以尚書右僕射贈尚書令王曾太尉贈尚

書令呂夷簡彰武軍節度使贈侍中曹瑋配享仁宗

神宗本紀神宗熙寧八年六月戊午太師魏國公韓琦  
薨己未以琦配享英宗廟庭

元豐元年閏正月己亥太傅兼侍中曾公亮薨癸卯以  
公亮配享英宗廟庭

建炎以來朝野雜記祖宗故事大臣配享皆祔廟後  
議之若趙韓王曹秦王之配享太祖蓋真宗咸平時  
而韓魏王曾魯公之配享英宗皆其身薨日降制亦

在祔廟十數年後

宋史禮志熙寧末嘗詔太常禮院講求親祠太廟不及功臣禮例至是禘祫外親享太廟並以功臣與又從太常禮院請配享功臣以見贈官書板位

文獻通考元豐三年詳定郊廟奉祀禮文所言謹案書盤庚曰茲予大享于先王爾祖其從與享之周禮司勳凡有功者祭于大烝然則書之所謂大享即禮之所謂大烝也烝冬祭也謂之大者物成衆多之時其祭比三



時為大也方是時百物皆報焉祭有功宜矣禮記祭統  
衛孔悝之鼎銘曰勤大命施于烝彝鼎後世烝祭不及  
功臣既不合禮而禘祫及之事不經見梁初誤禘功臣  
何佟之以為夏物未成而禘功臣為非典禮唐韋挺亦  
云今禘祫以功臣配享而冬烝不及與經不合蓋因仍  
之誤也伏請每遇冬烝以功臣配享其禘祫配享罷之  
詔凡冬享禘祫及親祠功臣並配享

宋史哲宗本紀元祐元年六月戊申以富弼配享神宗

廟庭

紹聖元年夏四月甲寅以王安石配享神宗廟庭

三年二月癸酉罷富弼配享神宗廟庭

禮志元祐初從吏部尚書孫永等議以故司徒贈太尉富弼配享神宗紹聖初又以守司空贈太傅王安石配三年罷富弼配謂弼得罪於先帝也

蘇氏軾論周禮擅議配劄子本朝自祖宗以來推擇元勲重望始終全德之臣以配食列聖蓋自天子所

不敢專必命都省集議其人非天下公議所屬不在此選奏議既上詔云恭依冊告宗廟然後敢行其嚴如此豈有既行之後復使疏遠小臣各出私意以議所配若置而不問則宗廟不嚴而朝廷輕矣褻矣安石平生所為是非邪正中外具知難逃聖鑒先帝蓋亦知之故置之閑散終不復用今已改青苗等法而廢退安石黨人呂惠卿李定之徒至於學校貢舉亦已罷斥佛老禁止字學大議已定行之數年而先帝

配享已定用富弼天下翕然以為至當種復何敢建  
此議意欲以此嘗試朝廷漸進邪說伏望聖慈重賜  
責降以儆在位

崇寧元年詔以觀文殿大學士贈太師蔡確配享哲宗  
廟庭

政和五禮新儀配享功臣之位設于殿庭之次趙普曹  
彬位于橫街之南道西東向第一次薛居正石熙載潘  
美位于第二次李沆王旦李繼隆位于第三次俱北上

王曾呂夷簡曹瑋位于橫街之南道東西向第一次韓琦曾公亮位于第二次王安石位于第三次蔡確位于第四次俱北上惟冬享祫享徧設祭位

建炎初詔奪蔡確所贈太師汝南郡王追貶武泰軍節度副使更以左僕射贈太師司馬光配享哲宗既又罷王安石復以富弼配享神宗

趙鼎傳高宗即位除鼎司勳郎官久雨詔求闕政鼎言自熙寧間王安石用事變祖宗之法而民始病假

開國之謀造生邊患興理財之政窮困民力設虛無之學敗壞人才至崇寧初蔡京托紹述之名盡祖安石之政凡今日之患始於安石成於蔡京今安石猶配享廟庭而京之黨未除時政之闕莫大於是上為罷安石配享

宋會要紹興四年太常少卿江端友請明堂前一日差官詣配祀功臣位行禮緣即今權于温州真華宮奉安宗廟比在京事體不同欲依紹興元年明堂更

不排辨從之

宋史高宗本紀紹興八年三月壬寅定以故相韓忠彥配享徽宗廟庭

揮塵前錄本朝曹武惠配享太祖武穆配享仁宗韓忠獻配享英宗文定配享徽宗父子配享自昔所無也

禮志紹興十八年二月監登聞鼓院徐璉言國家原廟佐命配享當時輔弼勲勞之臣繪象廟庭以示不

忘累朝不過一十餘人今之臣僚與其家之子孫必有存其繪像者望詔有司尋訪復摹于景靈宮庭之壁非獨假寵功臣之子孫所以增重祖宗之德業以爲臣子勸遂下諸路轉運司委所管州軍尋訪各家韓王趙普周王曹彬太師薛居正石熙載鄭王潘美太師李沆王旦李繼隆王曾呂夷簡侍中曹瑋司徒韓琦太師曾公亮富弼司馬光韓忠彥各令摹寫貌像投納繪于景靈宮之壁



紹興二十七年六月戊午初命太廟冬享祭功臣

孝宗本紀乾道五年九月甲子詔侍從臺諫集議欽宗配享功臣

禮志乾道五年九月太常少卿林栗等言欽宗皇帝廟庭尚虛配享當時遭值艱難淪胥莫救罕可稱述而以身殉國名節暴著不無其人雖生前官品不應配享之科事變非常難拘定制乞特詔集議吏部尚書汪應辰奏當時死事之臣皆有次第褒贈若今配享欽廟典故

所無如創行之又當訪究本末差次輕重有所取舍尤不可輕易竊謂配享功臣若依唐制各廟既無其人則當缺之廼罷集議欽宗一廟遂無配享

文獻通考侍右郎官曾逮言昔元祐中神宗未有配享朝廷依例權塑二侍臣吏部尚書汪應辰言欽宗所圖共政之臣皆未有能勝其任者若應故事姑令備數上非所以尊宗廟下非所以勸有功誠如太常所言當時死事之臣非一今欲令配享考究本末差

次輕重有所取捨尤不可輕易昔唐文宗武宗皆無配享功臣蓋崇奉祖宗必審其實必當于理不虛尚文飾以苟塞人情而已既無可配享者乞更不集議從之

孝宗本紀淳熙十五年三月癸丑用洪邁議以呂頤浩趙鼎韓世忠張俊配享高宗廟庭

禮志淳熙中高宗祔廟翰林學士洪邁言配食功臣先期議定臣兩蒙宣諭欲用文武臣兩人文臣故宰相贈

太師秦國公謚忠穆呂頤浩特進觀文殿大學士謚忠簡趙鼎武臣太師蘄王謚忠武韓世忠太師魯王謚忠烈張俊此四人皆一時名將相合于天下公論議者皆以為宜遂從之祕書少監楊萬里獨謂丞相張浚不得配食為非爭之不得因去位焉

清波雜志國朝配享功臣于太廟橫街南東西相向設位太祖室趙普曹彬太宗室薛居正石熙載真宗室李沆王旦李繼隆仁宗室王曾呂夷簡英宗室韓

琦曾公亮神宗室富弼曹瑋哲宗室司馬光徽宗室  
韓忠彥高宗室呂頤浩趙鼎韓世忠張俊視祖宗文  
武各用二人侑食蓋中興將相勲烈之盛不得而遺  
也

紹興五年十二月以左丞相贈太師魯國公陳康伯配  
享孝宗廟庭

建炎以來朝野雜記孝宗既祔廟詔以故相陳康伯  
侑食寶文閣待制吳總上疏請以其父璘配享廟庭

不報

宋史禮志初仁宗天聖中郊祀詔錄故相李昉宋琪  
呂端張齊賢畢士安王旦執政李至王沔溫仲舒及  
陳洪進等子孫以官元豐中詔景靈宮繪像舊臣推  
恩本支下兩房以上取不食錄者均有無取齒長者  
若子孫亦繪像本房不食祿更不取別房紹聖初林  
希請稽考慶歷以後未經編次臣僚其子孫應錄用  
者以次編定尋詔趙普杜稷殊勲其諸孤有無食祿

者各官其一子以長幼為序毋過三人崇寧初詔哲  
宗繪像文武臣僚並與子若孫一人初品官若子孫  
衆多毋過家一人又錄藝祖功臣呂餘慶族孫偉及  
司徒富弼孫直柔直道以官使奉其祀靖康初臣僚  
言司馬光之後再絕復立族子稹稹亦卒今雖有子  
而光遺表恩澤已五十年不可復奏請許移奏見存  
曾孫使之世祿從之

寧宗本紀嘉泰元年春正月庚午以葛郊配享光宗廟

庭

嘉定十四年八月乙丑追封史浩為越王改謚忠定配  
享孝宗廟庭

理宗本紀端平二年八月乙卯以太師趙汝愚配享寧  
宗廟庭仍圖像于昭勲崇德之閣

右宋

遼史興宗本紀重熙二十一年八月戊子太尉烏哲薨  
詔配享聖宗廟



金史禮志天德二年二月太廟祫享有司擬上配享功臣詔以薩哈希卜蘇舍音幹魯鄂斯歡忠東向配太祖位以尼瑪哈幹里雅布宗望棟摩羅索尼楚赫西向配太祖位

大定三年十月祫享又以舍音幹魯薩哈希卜蘇鄂斯歡配享太祖宗望棟摩宗翰羅索尼楚赫配享太宗其後次序屢有更易

世宗本紀大定八年十月乙未命圖畫功臣于太祖廟

其未立碑者立之

禮志大定八年上命圖畫功臣于太祖廟有司第祖宗  
佐命之臣勲績之大小官資之崇卑以次上聞乃定左  
庶開府金源郡王薩哈皇伯太師右副元帥宋王宗望  
開府金源郡王幹魯皇伯太師梁王宗弼開府金源郡  
王羅索皇叔祖元帥左都監魯王棟摩開府隋國公阿  
里罕儀同三司充國公劉彥宗右丞相齊國簡懿公韓  
企先特進宗人希卜蘇右庶太師秦王宗翰皇叔祖遼

王杲開府金源郡王希卜蘇開府金源郡王完顏希尹  
太傅楚王宗雄開府前燕京留守金源郡王完顏尼楚  
赫開府金源郡王完顏忠金源郡王完顏薩里罕特進  
宗人幹魯右丞相金源郡王赫舍哩志寧

大定十六年左廡遷梁王宗弼于幹魯上 十八年黜  
希卜蘇而次于普嘉努阿里罕之下 二十二年增皇

伯太師遼王舍音薩哈宗幹宗翰宗望其下以次列

章宗本紀明昌四年三月甲午定配享功臣

禮志明昌四年次序始定東廊皇叔祖遼智烈王舍音  
果皇伯太師遼忠烈王宗幹幹布皇伯太師右副元帥  
宋桓肅王幹里雅布宗望開府儀同三司金源郡毅武王  
希卜蘇開府儀同三司金源郡貞憲王完顏古新希尹  
太傅楚威敏王摩羅歡宗雄開府儀同三司燕京留守  
金源郡襄武王完顏尼楚赫開府儀同三司金源郡明毅  
王完顏忠鄂斯歡金源郡莊襄王果薩里罕特進宗人  
幹魯莊翼特進完顏希卜蘇威敬太師尚書令淄忠烈

王圖克坦克寧太師尚書令南陽郡文康王張浩西廊  
開府儀同三司金源郡忠毅王薩哈太師秦桓忠王尼  
瑪哈宗翰皇伯太師梁忠烈王烏珠宗弼開府儀同三  
司金源郡剛烈王幹魯開府儀同三司金源郡莊義王完  
顏羅索皇叔祖元帥左都監魯莊明王棟摩開府儀同  
三司隋國剛憲公阿里罕開府儀同三司豫國襄毅公  
普嘉努昱開府儀同三司兗國英敏公劉彥宗右丞相  
齊國簡懿公韓企先太保尚書令廣平郡襄簡王李石

開府儀同三司右丞相金源郡武定王赫舍哩志寧開府儀  
同三司左丞相沂國公布薩忠義儀同三司左丞相崇  
國公赫舍哩良弼右丞相莘國公石琚右丞相申國公  
唐古安禮開府儀同三司平章政事圖克坦喀齊喀參知  
政事宗敘每一朝為一列著為令

章宗本紀明昌五年閏十月丙寅以代國公罕都等五  
人配享世祖廟庭

禮志明昌五年閏十月丙寅以儀同三司代國公罕都

銀青光祿大夫伊克特進和卓開府儀同三司博諾儀  
同三司巴達配享世祖廟庭

享日並出神主前廊序列昭穆應圖功臣配享廟庭各  
配所事之廟以位次為定

王圻續通考南陽郡王完顏襄壽國公張萬公皆配享  
章宗廟庭平章政事延安郡王布薩端尚書右丞壽國  
公高汝礪宰相福興皆配享宣宗廟庭

完顏薩布傳正大三年宣宗廟成將禘祭議配享功

臣論者紛紜賽不為大禮使因言丞相福興死王事  
齊勤謹守河南以迎大駕功宜配享議遂定

元史祭祀志英宗初博士言今冬祭即烝也天子親裸  
太室功臣宜配享事弗果行

右遼金元

明會典洪武二年孟春享太廟以功臣七人配遣官分  
獻讀祝

王圻續通考洪武二年正月享太廟以功臣廖永忠俞



通海張德勝桑世傑耿再成胡大海趙德勝配享設青  
布幃六間于太廟庭中內設配享功臣位籩豆各二實  
以栗棗牛脯葵菹鹿醢簋各二實以黍稷稻粱羊豕  
體各一遣官分獻其分獻儀皇帝行亞獻禮將畢分獻  
官各詣盥洗所盥手洗爵酌酒諸執事官皆酌酒于爵  
獻官進詣功臣第一位前上香奠爵諸執事官各進爵  
于各神位前讀祝官讀祝訖獻官復位其配享祝文曰  
朕以孟春嚴奉廟享追念忠烈輔成開基爰用牲醴陳

于廟庭英靈如生尚其與享

明史禮志洪武三年定配享功臣常遇春以下凡八位  
春夏於仁祖廟西廡秋冬於德祖廟西廡設位東向遂  
罷幃次之設更定三獻禮皇帝初獻時獻官即分詣行  
禮不拜

明會典洪武三年定親王從享皆設位于東廡西向功  
臣配享皆設位于西廡東向

明史禮志洪武三年定以皇伯考壽春王王夫人劉氏

為一壇皇兄南昌王霍邱王下蔡王安豐王霍邱王夫人翟氏安豐王夫人趙氏為一壇皇兄蒙城王盱眙王臨淮王臨淮王夫人劉氏為一壇後定夫人皆改稱妃皇姪寶應王六安王來安王都梁王英山王山陽王昭信王為一壇凡一十九位春夏于仁祖廟東廡秋冬及歲除於德祖廟東廡皇帝行初獻禮時獻官詣神位分獻四年進親王於殿內東壁

王圻續通考明太祖洪武三年壽春十五王進侑四

祖廟案壽春於孝陵為伯南昌七王兄寶應七王從子也余從大夫後助祭太廟見廡中木主稱壽春八王為高伯祖考寶應七王為曾伯祖考禮官誤矣

四年太祖謂中書省臣太廟之祭以功臣配列廡間今既定太廟合祭禮朕以祖宗具在使功臣故舊沒者得少依神靈以同享祀不獨朝廷宗廟盛典亦以寓朕不忘功臣之心於是禮官議凡合祭時為黃布幄殿中祖考神位旁設兩壁以享親王及功臣令大臣分獻制可

已而命去布幄

四年罷廟庭幃設之次改設黃布幃殿于廟內併具兩  
廡中居祖考神位廡列親王及功臣每奠獻祖考則遣  
大臣各分獻不讀祝是秋又命功臣仍于廡間配享不  
設布殿

蕙田案親王配享自太祖創也

太祖本紀洪武六年錄故功臣子孫未嗣者二百九  
人

九年新太廟成增祀蒙城王妃田氏盱眙王妃唐氏以徐達常遇春李文忠鄧愈湯和沐英俞通海張德勝胡大海趙德勝耿再成桑世傑十二位配于西廡罷廖永安

明會典洪武九年奉安四代神主以親王并王妃二十一位侑于殿內東壁功臣十二位配于西壁不分獻自是四時之祭皆行合享之禮

明史太祖本紀洪武十年錄故功臣子孫五百餘人

明會典洪武二十年定凡祭功臣令軍官首領官陪  
明史禮志建文時禮部侍郎宋禮言功臣自有雞籠山  
廟請罷太廟配享帝以先帝所定不從且令候太廟享  
畢別遣官即其廟祭之

洪熙元年以張玉朱能王真姚廣孝配享太廟遣張輔  
朱勇王通及尚寶少卿姚繼各祭其父

王圻續通考嘉靖九年申允廖道南言廣孝髡徒不宜  
入廟禮官李時與張璉桂萼亦以為言遂移祀大興隆

寺

明史禮志嘉靖十年以刑部郎中李瑜議進劉基位次  
六王

十六年以武定侯郭勛奏進其祖英初二廟功臣位各  
以爵及進基位公侯上至是復令禮官議合二廟功臣  
叙爵於是列英於桑世傑上張玉朱能於世傑下

王圻續通考武定侯郭勛乞進其祖英侑享高廟下  
廷議不可戶部侍郎唐胄䟽爭言廟祀諸臣位次上



下且不可易況有無之額敢輒增損乎勛言往年進  
劉基祔享以文臣故舉朝翕然順從臣祖英武臣乃  
紛然阻忌上是勛言進英祀先是二廟侑享功臣位  
各以爵及進基伯位公侯上帝不喜曰何上基而下  
英也令禮官考議乃合二廟功臣叙爵于是列英永  
義侯上河間東平二王黔寧王下基永義侯下初郭  
英未進侑時禮官夏言言禮有功宗之祀漢祭功臣  
于廟庭魏祀尚書令荀攸于太祖廟唐高祖至憲宗

廟或六七八人或二三四人宋太祖至光宗亦然如  
魏徵李沆司馬光皆文臣不必皆武功也守成諸君  
亦各有與享者不必皆創業也我朝二祖開國靖難  
固有功臣仁宗以無事武功其間相與輔贊治平豈  
無有如魏徵李沆輩者今侑享二祖凡十七人十七  
人中惟基廣孝二人文臣耳自後六廟缺焉無聞乞  
下廷議考求六朝文武大臣有功在當時澤在後世  
者請上裁定進侑廟庭帝不允

配享功臣十七人中山武寧王徐達開平忠武王常  
遇春岐陽武靖王李文忠寧河武順王鄧愈東甌襄  
武王湯和黔寧昭靖王沐英河間忠武王張玉東平  
武烈王朱能虢國忠烈公俞通海蔡國忠毅公張德  
勝越國武莊公胡大海梁國武桓公趙德勝泗國武  
莊公耿再成營國威襄公郭英寧國公王真永義侯  
桑世傑誠意伯劉基皆左右叙

二十四年進諸配位於新太廟西壁罷分獻

太常紀神宗萬歷九年給事中丁汝謙言諸王世次  
遠宜罷祭祭於墓親王之殤無後而近者宜配凡親  
王功臣宜列兩廡上以汝謙議睿廟謫汝謙遂未行  
萬歷十四年太常卿裴應章言諸王本從祖祔食今四  
祖之廟已祧而諸王無所於祔宜罷享而祔之祧廟禮  
部言祧以藏毀廟之主為祖非為孫禮有祧不聞有配  
祧者請仍遵初制序列東廡為近禮報可

又言廟中列后在上異姓之臣禮當別嫌且至尊拜俯

於下諸臣之靈亦必不安命改復西廡遣官分獻

太常紀裴應章言諸王從祖祔食四祖親盡且祧而諸王得配享百世非所以為殺也壽春等王於太祖為伯為兄太祖南面而伯若兄俯而侑于側非所以為順也列后在享諸功臣同坐一堂非所以為別也其以諸王祔祧廟歲祫則祔餘則罷功臣移之廡便上下禮官宗伯沈鯉議曰臣考儀禮諸書與前代故事無親王祔享之儀是太祖以義起者也宗廟之祭

祫為重故禮稱彌遠而彌尊時享不可預而預於祫其無乃未安乎竊謂諸王墳墓近皇陵則祔皇陵之廟近祖陵則祔祖陵之廟于禮無嫌亦不失太祖遺意但考洪武四年初享十五王之文曰朕念親親之道無間存沒凡我伯考兄姪悉追封為王伯妣先嫂皆為王夫人列祀宗廟著為常典臣不敢議罷其仍遵初制序列東廡功臣列西廡惟上裁擇上曰可於是諸王功臣列兩廡遣官分獻如國初制矣

天啟元年太常少卿李宗延言前代文臣皆有從祀我朝不宜獨缺下禮部議不行

春明夢餘錄明高祖定鼎念諸功臣之烈建太廟首以李韓公善長等六人及胡越公大海等從享最後韓公坐嫌死而六公亦間不得與逮永樂而始定自中山開平二王而下距永義侯桑世傑凡六王五公一侯十二人從文皇祀者至洪熙而定文武臣惟河間王玉東平王能寧國公真榮國公廣孝凡二王二

公至世宗首上太祖徽號後上文皇帝祖號又采禮  
官言進誠意伯從祀太祖位六王下而以僧故斥廣  
孝使祀大興隆寺尋用翊國公勛請進其祖營國公  
英獨仁宗而後寥寥無聞論者謂如楊文貞李文達  
高文毅劉文清楊文忠之賢于輔而不得從蹇忠定  
王忠肅王端毅馬端肅于肅愍之賢于樞而不得從  
張定興輔之下南交朱宣平永之八佩將印皆位太  
師握環衛為心膂牙爪而不得從高帝諸功臣而下



猶有說焉若李韓公之佐開創不下鄼侯雖以嫌死  
帝尚為之諱若馮宋公勝之佐大將軍取中原下秦  
隴降納哈出二十萬之衆傳穎公友德之從大將軍  
取山東其平蜀功冠徹侯而開滇南二百年之地惜  
其終于帝之末遘革除之變而未有舉也

右明

五禮通考卷一百二十二